



МОНГОЛ УЛСЫН ЗАСГИЙН ГАЗРЫН ТОГТООЛ

2024 оны 02 сарын 28 өдөр

Дугаар 72

Улаанбаатар хот


Журам шинэчлэн батлах тухай

Засгийн газрын тусгай сангийн тухай хуулийн 8.4-т заасныг үндэслэн Монгол Улсын Засгийн газраас ТОГТООХ нь:

1.“Боловсролын зээлийн сангийн хөрөнгийг зарцуулах, түүнд хяналт тавих журам”-ыг хавсралт ёсоор шинэчлэн баталсугай.

2.Энэ тогтоолын 1-д заасан журмын хэрэгжилтийг хангаж ажиллахыг Боловсрол, шинжлэх ухааны сайд Л.Энх-Амгаланд даалгасугай.

3.Энэ тогтоол гарсантай холбогдуулан “Журам батлах тухай” Засгийн газрын 2021 оны 11 дүгээр сарын 10-ны өдрийн 347 дугаар тогтоолыг хүчингүй болсонд тооцсугай.



МОНГОЛ УЛСЫН ЕРӨНХИЙ САЙД

Л.ОЮУН-ЭРДЭНЭ

БОЛОВСРОЛ, ШИНЖЛЭХ
УХААНЫ САЙД

Л.ЭНХ-АМГАЛАН

УТА1206 9023190304 6497449

Засгийн газрын 2024 оны 02 дугаар
сарын 28-ны өдрийн 72 дугаар
тогтоолын хавсралт

БОЛОВСРОЛЫН ЗЭЭЛИЙН САНГИЙН ХӨРӨНГИЙГ ЗАРЦУУЛАХ,
ТҮҮНД ХЯНАЛТ ТАВИХ ЖУРАМ

Нэг. Нийтлэг үндэслэл

1.1. Засгийн газрын тусгай сангийн тухай хуулийн 8 дугаар зүйлд заасан Боловсролын зээлийн сан (цаашид “сан” гэх)-ийн хөрөнгийг бүрдүүлэх, зарцуулах, түүнд хяналт тавихтай холбоотой үйл ажиллагааг энэ журмаар зохицуулна.

1.2. Сангийн хөрөнгийг бүрдүүлэх, зарцуулах, түүнд хяналт тавих үйл ажиллагаанд Засгийн газрын тусгай сангийн тухай хууль, Төсвийн тухай хууль, Өрийн удирдлагын тухай хууль, Боловсролын ерөнхий хууль, Дээд боловсролын тухай хууль, Багшийн хөгжлийг дэмжих тухай хууль, Хөгжлийн бэрхшээлтэй хүний эрхийн тухай хууль, Залуучуудын хөгжлийг дэмжих тухай хууль, Иргэний хууль, Шилэн дансны тухай хууль болон холбогдох бусад хууль тогтоомж, энэ журмыг баримтална.

Хоёр. Сангийн удирдлага, зохион байгуулалт

2.1. Сангийн хөрөнгийн бүрдүүлэлт, зарцуулалтыг Засгийн газрын тусгай сангийн тухай хуулийн 22.5-д зааснаар боловсролын асуудал эрхэлсэн Засгийн газрын гишүүн хариуцан удирдана.

2.2. Сангаас Засгийн газрын тусгай сангийн тухай хуулийн 8.1-д заасан иргэнд сургалтын төлбөрийн зээл, тэтгэлэг олгох, мөн хуулийн 8.3-т заасны дагуу бусад санхүүгийн дэмжлэг олгох шийдвэрийг Ажлын хэсгийн сонгон шалгаруулалтын дүнд үндэслэн боловсролын асуудал эрхэлсэн Засгийн газрын гишүүн гаргана.

2.3. Боловсролын зээлийн сан нь Засгийн газрын тусгай сангийн тухай хуулийн 22.3-т зааснаар Ажлын албатай байх бөгөөд Ажлын албаны орон тооны хязгаарыг Засгийн газар батална.

2.4. Ажлын алба нь сангийн өдөр тутмын үйл ажиллагааг эрхлэн гүйцэтгэнэ.

2.5. Ажлын албаны зохион байгуулалтын бүтэц, ажиллах журмыг боловсролын асуудал эрхэлсэн Засгийн газрын гишүүн баталж, даргыг томилж, чөлөөлнө.

Гурав. Сангийн хөрөнгийн бүрдүүлэлт, зарцуулалт

3.1. Сангийн хөрөнгө нь Засгийн газрын тусгай сангийн тухай хуулийн 6.1-д заасан эх үүсвэрээс бүрдэнэ.

3.2. Энэ журмын 3.1-д заасан хөрөнгийг Төрийн сангийн тусгай дансанд байршуулна.

3.3. Сангийн хөрөнгийг Засгийн газрын тусгай сангийн тухай хуулийн 8.3-т заасны дагуу дараах арга хэмжээг санхүүжүүлэхэд зарцуулна:

3.3.1. Энэ журмын 3.3.2, 3.3.4-т зааснаас бусад гадаад, дотоодын дээд боловсролын сургалтын байгууллагын суралцагчид олгох тэтгэлэг, сургалтын төлбөрийн зээл, хуулиар тогтоосон бусад санхүүгийн дэмжлэг;

3.3.2. Багш болон Боловсролын ерөнхий хуулийн 12.7-д заасан багш мэргэжлээр суралцагчид олгох санхүүгийн дэмжлэг;

3.3.3. Боловсролын ерөнхий хуулийн 13.3.6-д заасан багш, ажилтны нэг хуухдийг тэргүүлэх, эрэлттэй мэргэжлээр төрийн өмчийн дээд боловсролын сургалтын байгууллагад үнэ төлбөргүй, хөнгөлөлттэй нөхцөлөөр суралцуулахад олгох санхүүгийн дэмжлэг;

3.3.4. Төрийн албаны тухай хуулийн 61.1.7-д заасны дагуу сургалтад хамрагдах төрийн албан хаагчдад олгох санхүүгийн дэмжлэг;

3.3.5. сангийн үндсэн үйл ажиллагаа, үндсэн хөрөнгөтэй холбогдсон зардал.

3.4. Сангийн санхүүжилтийг Засгийн газрын тусгай сангийн тухай хуулийн 23.5-д зааснаар Төсвийн тухай хуульд заасан журмын дагуу хийнэ.

3.5. Энэ журмын 3.3.1-3.3.4-т заасан тэтгэлэг, зээл олгох болон бусад санхүүгийн дэмжлэг үзүүлэх сонгон шалгаруулалт, гэрээ байгуулах, түдгэлзүүлэх, дуусгавар болгохтой холбогдсон харилцааг Засгийн газраас баталсан холбогдох журмаар зохицуулна.

Дөрөв. Сангийн хөрөнгийн зарцуулалтад хяналт тавих

4.1. Сангийн хөрөнгийн бүрдүүлэлт, зарцуулалтад тавих хяналтыг Засгийн газрын тусгай сангийн тухай хуулийн 22.5-д заасны дагуу хэрэгжүүлнэ.

4.2. Сангийн Ажлын алба гүйцэтгэсэн ажлын үр дүн, төсвийн зарцуулалтын нэгдсэн тайланг холбогдох хууль, журамд заасан хугацаанд боловсролын асуудал эрхэлсэн төрийн захиргааны төв байгууллагад хүргүүлнэ.

4.3. Боловсролын асуудал эрхэлсэн Засгийн газрын гишүүн Засгийн газрын тусгай сангийн тухай хуулийн 24.1-д заасны дагуу сангийн хөрөнгийн зарцуулалтын тайланг хагас, бүтэн жилээр гарган санхүү, төсвийн асуудал эрхэлсэн төрийн захиргааны төв байгууллагад хүргүүлнэ.

4.4. Сангийн хөрөнгийн зарцуулалтын жилийн эцсийн тайланд Төрийн аудитын тухай хуульд заасны дагуу аудит хийж, дүгнэлтийн хамт уг тайлан гарснаас хойш 20 хоногийн дотор байгууллагын цахим хуудас болон шилэн дансанд байршуулна.

4.5. Сангийн хөрөнгийн зарцуулалт, гүйцэтгэл, санхүүжүүлсэн арга хэмжээний мэдээллийг, холбогдох шийдвэрийн хамт Засгийн газрын тусгай сангийн тухай хуулийн 24.2-т заасны дагуу олон нийтэд мэдээлж, тогтмол шинэчилнэ.